

四庫全書

史部

欽定四庫全書

欽定八旗通志卷九十五

學校志二

八旗官學上

謹案上卷係官學生選補及在學肄業之事

順治元年十一月國子監祭酒李若琳疏言近奉

旨滿洲官員子弟咸就成均肄業而國學在城東北隅諸

子弟往返晷短途遙臣等謹議滿洲八旗地方各

覓空房一所立為書院將國學二廳六堂教官分

教八旗子弟各旗下仍設學長四人俱就各旗書院居住朝夕誨迪臣等不時親詣稽察勤惰仍定於每月逢六日各師長率子弟同進國子監臣當堂考課以示懲勸下禮部議行

二年五月從國子監祭酒薛所蘊請

命滿洲子弟就學分為四處每處用伴讀十人勤加教習十日一次赴監考課遇春秋演射五日一次就本處習練俾文武兼資以儲實用

是年九月增官學生額先是每佐領各取官學生一名以十名習漢書餘習滿書至是禮部奏請增額

命每佐領增取一名於原額習漢書十名外加用十名餘俱滿書

十一年題准八旗每佐領下留官學生各一名禮部會同國子監詳加察驗如學業無成者各歸佐領仍於本佐領下選擇頂補以後三年一次察驗

永為定例

十三年

諭禮部文武乃治天下之極要不可偏向今見八旗人等
專尚讀書有子弟幾人俱令讀書不肯習武殊違我朝
以武功定天下之意爾部酌量每佐領下應讀滿漢書
幾名更定具奏凡部院考用者俱照額定讀書子弟內
選用考試額外私自讀書者部院不准選用考試

是年禮部議定滿洲蒙古漢軍前經題明每佐領

止留一人讀書滿洲蒙古官學生不往外省作官
止許在部院衙門選用且奉

恩詔滿洲蒙古三品官以上廕一子入監遇部院衙門考
用之時此等亦可選用今滿洲蒙古仍照前定之
例每佐領下止留一人其漢軍官學生既內外並
用應於每佐領一人外再添一人其考試生員舉
人進士及部院衙門選用俱應於額定數內方准
考選額外私自讀書者不准考選

十四年正月禮部奏言蒙古官學生補用之缺少
應合兩佐領出一人讀書漢軍官學生或仍舊例
每佐領出二人讀書或因進士舉人生員停其考
試視滿洲例每佐領止出一人讀書奉

旨漢軍官學生如滿洲例每佐領止出一人讀書

十八年

諭滿洲漢軍每佐領各增官學生一名共送子弟二人一
習滿書一習漢書止許武官及甲兵子弟開送文官子

弟不准開送

康熙元年定八旗官學生每月赴監講書一次繙

譯一次五日射箭一次

又定八旗滿洲蒙古漢軍隨印外郎缺由本旗咨
報吏部行文到監於本旗年久官學生內遴選一
人咨送吏部考試繙譯補用

六年題准凡官學生除該監照常考試外每年禮
部嚴加考試一次分別等第送部錄用如某旗官

學生肄業怠廢即開列助教教習職名叅處

九年十一月禮部據國子監呈奏言

世祖章皇帝時八旗官學生不論文武官員子弟每佐領
下選擇二名移送國子監教習後順治十八年奉
有文官子弟不許送官學生之

旨但官學生俱係部院衙門錄用關係緊要且今奉

諭旨文武廕監仍以部院衙門錄用以後應仍遵

世祖章皇帝時例不論文武官員子弟令本佐領將可學

之人移送本監教習

詔從所議

十一年題准每佐領下裁官學生各一名於所留官學生內均分習學滿漢書

是年四月禮部議覆蒙古官學生補用之路合計不過數缺或數年方出一缺又有廕生監生間補官學生補用甚難今滿洲漢軍官學生奉

旨裁減每佐領止存一人蒙古官學生亦應裁減每二佐

領合留一人奉

旨依議

十六年題准官學生以生員俊秀選補如本佐領
下無生員俊秀方選補閒散人

四十八年十月

諭八旗漢軍人等亦著應武鄉會試隨經兵部題准八旗
漢軍由官學生補授之外郎有願考武生者該旗
開具姓名移送順天府照例考取武生鄉試時將

所取武生該旗亦開列姓名移送順天府一體考試取中

五十年改八旗官學生隨國子監六堂諸生在監肄業

尋議改設四學每兩旗共為一學

雍正元年九月吏部覆准國子監司業博禮條奏官學生等不可濫取應於該佐領下無論官兵子弟不許瞻徇情面擇其資性穎秀可以讀書上進

者一人著叅領佐領保送都統驗看移送國子監肄業務令實在學習不得徒飾虛名查設立官學原為作養人材肄業子弟豈容濫取應如博禮所請嗣後官學生缺出於佐領下選擇移送國子監衙門令其從實肄業

二年覆准設立官學原欲清漢兼優精通繙譯以備部院衙門補用可任職事飭令國子監滿漢祭酒司業轉飭助教教習等官每日親臨官學將官

學生內習滿文者教以書寫本摺字畫習文章者
講論聖賢經傳習繙譯者熟繙古文淵鑒大學衍
義等書祭酒司業不時巡行親查以勸勤儆惰每
月傳至國子監考試一次分別優劣優者獎賞劣
者戒懲俾有實效毋存虛名

五年十月康親王果郡王議覆國子監祭酒孫嘉
淦條奏八旗設立官學原欲比戶皆沾教澤不必
拘定門第但學滿文者可用幼穉之人其學漢文

繙譯者必得十四五以上資性聰敏之人方易啟
迪嗣後選官學生務令該佐領擇聰明俊秀子弟
申送驗看交與國子監當堂考錄其年幼者令學
滿文其稍長者令學漢文庶將來皆有可成再查
舊例八旗滿洲蒙古漢軍每佐領下必選一人入
學若拘於定額則恐草率塞責若聽其缺額又恐
人數太少酌定每旗額設學生一百名內滿洲六
十名蒙古二十名漢軍二十名其滿洲六十名內

照例分三十名在滿書房習清文三十名在漢書房習漢文凡有學生缺出通在一旗選擇不必拘定佐領之數庶學生皆得秀良不致混行申送再查學舍乃諸生講誦之所今每學止三四間一旗三學共十三四間不等實屬狹隘應將現今官房交還各該旗查收每旗另給官房一所二十餘間量可容百人誦習者著本旗修理俾諸生聚處其中則學舍寬適便於誦讀矣再八旗官學生向來

皆無錢糧以故無力之家不能行走查得八旗蒙
聖主洪恩設教養兵滿洲三千六百八十名蒙古四百八
十名漢軍九百六十名滿洲蒙古每名一月給銀
三兩漢軍每名給銀二兩令其學習弓馬所以

惠愛八旗之人典至渥也但查八旗教養兵有幼穉之人
以充額數不能操弓上馬而官學生年壯者往往
挑選披甲伏思今官學生內有年壯而讀書遲鈍
者令回旗披甲其所出之缺選年幼者補之以習

滿文俟其稍長益學弓馬則彼此皆有裨益伏望
聖恩飭令八旗將教養兵額數滿洲分出三十名蒙古漢
軍各分出十名以此五十名錢糧給官學生計滿
洲蒙古每名月領銀一兩五錢漢軍每名一兩則
壯者既有錢糧以學弓馬幼者亦有錢糧以學文
藝長幼並蒙

聖恩文武皆得造就矣應將八旗教養兵清查實數如目
前現缺五十名者即照數目撥給官學如缺額之

數不及五十名者俟其將來缺出陸續撥給官學以漸足五十名之數如此一轉移間則錢糧不必加增而官學生皆沾

聖恩鼓舞振興矣奉

旨所議是依議

十年奏准八旗漢軍舊家大臣子孫內無力延師者左翼二十一人右翼十一人每人月給銀二兩令其就本旗官學該助教與教習等課讀清漢書

再於兩翼滿洲內選教騎射之教習各一間日赴學教國語並馬步射每人月給銀三兩

乾隆三年奏准八旗子弟選取入學三年之內令其專誦經書朝夕講課三年後監臣考驗擇其材質聰穎有志力學者歸漢文班分隸教習令其專心誦誦其年齒已長願學繙譯者歸滿文班分隸助教令專心繙譯

是年尚書孫嘉淦奏稱官學舊例其學繙譯者考

筆帖式而已間有粗通文義者考文武生員而已
原以明經治事之實學非旦夕可致之功是以未
敢專定章程查國子監拔貢人等現蒙

皇上天恩月給廩餼講求明經治事之學頗有端緒臣
等請將八旗官學生之歸漢文班者不必專講四
書亦使之講求經史為有用之學每三年一次錄
其可以應考者奏請

欽點大臣來監考驗取其明通者授為監生由官學而

陞之太學使與拔貢人等明經治事期滿出色者一體保舉考選錄用奉

旨著照所請行

四年奏准各部寺八旗庫使員缺由國子監將本旗官學生嚴加考試繙譯取中四人併卷咨送吏部再行考擇充補

六年奏准官學生歸漢文班者邇年以來頗知奮勉但諸生年幼度其資力止能於四書外專治一

經史冊浩繁乍難責其研究見在加意教導至明年八九月間擇其可以應考者繕摺奏聞請

欽點大臣試以經文一篇論一道其中文理明順者酌量拔作監生令該旗造冊咨送本監與漢貢監生一同肄業講求明經治事之學期滿果有尤異者准予保舉

十一年侍郎兼管國子監宗室德沛奏言八旗官學子弟雖分清漢兩途但助教一官有督率一學

之責不但教習繙譯即漢文功課亦應稽查奉

旨依議

十二年將蒙古官學生額設二十名內挑入咸安
官學三名

十六年議准嗣後各部寺八旗庫使員缺吏部行文到監將本旗官學生考試繙譯每缺一人咨送
三人與覺羅官學生一并由吏部考擇充補

三十一年議准嗣後挑取官學生十八歲以下者

肄業統以十年為率如學漢文者不能進學習繙
譯及清話者不能考取中書筆帖式庫使概令咨
回本旗另挑差使

三十二年奏准下五旗包衣每旗各添設官學生
十名滿洲六缺蒙古二缺漢軍二缺照從前義學
之例不給錢糧

三十四年奏准官學生既經取中中書筆帖式庫
使等官將來俱有出身之路未便令其在學候補

應即開缺另行挑取

五十四年閏五月國子監奏請於官學生中驗其
年幼而多熟經書及文理明順者隨時挑取給與
雙分錢糧遇有缺出歸併每學限以十名之內寧
缺毋濫若一二年內學業不進仍行甄退並於該
學教習中擇其學問較優者將雙分錢糧官學生
專令督課果能功課勤密著有成效擬於報滿引
見分別錄用之後再行奏請咨部予以補官日紀錄一

次註冊奉

旨此項官學生額缺每旗於百名內裁去十名添作出
色學生膏火以示勸懲固不為多但於其中挑取十
人給與雙分錢糧未免過優嗣後如遇甄汰時百名
內陸續裁扣十名挑取多熟經書文理明白者二十
名將此十名錢糧分為二十分給予既足以昭鼓勵
又可以多育人材較為兩有裨益

附國子監議定八旗官學生條例

一八旗官學生由該旗都統選擇聰明俊秀子弟十八歲以下者用印文咨送國子監該助教帶領上堂公同察驗視其資質可造然後記名注冊充補

一官學生各有旗分如所居離本旗官學甚遠或天寒陰雨不能就學晷短途長未免曠時願於附近之別旗官學讀書者該助教帶領具呈准於附近官學讀書

一官學生定例以辰時上學申時散學設立到學簿每日令該生親自畫到稽查勤惰如有連日到遲及三日不到者該助教即行申飭倘不悛改呈堂斥革如學生偷安曠業而助教徇隱姑容者察出記過議處

一每館各立功課簿該教習飭令學生將每日所讀之書某書某處起止古文某篇時文某篇每期所作之文是何題目照實填寫不得浮開月終彙

交助教收存年終交國子監博士廳呈堂察核

一漢館每日常課有授書背書講書回講習字默書諸事備書於功課冊滿館學生則每日教清書蒙古學生則每日教蒙古語

一每月三八日漢館出題試文一篇五言六韻詩

一首未能成篇者
今作半篇滿館試繙譯或清書一道蒙古

試蒙古繙譯一道

一蒙古弓箭教習每日輪館教演步騎二射

一官學生於常課之外該助教教習每月會課一次漢館學生作文一篇蒙童背書一次滿洲蒙古二館學生各試繙譯一道又弓箭教習會同助教率領諸生出城校試馬步射一次

一官學生於春秋二季赴監會考各一次該助教預先呈冊定期傳知學生分兩班考試試東四學漢文繙譯之日兼試西四學步騎二射試西四學漢文繙譯之日兼試東四學步騎二射學生毋許

不到其實在患病者先期呈堂俟病痊補試

一李考漢文卷送滿漢堂官公同閱看滿文卷專送滿堂官閱看蒙古卷專送蒙古堂官閱看評定等第張榜傳集優者予獎賞劣者面加訓飭

一官學生李考列一等者獎賞紙筆墨刻由國子監檔子房交發到學該助教當堂分給以昭鼓勵一祭酒司業輪查各學該助教教習率領學生迎於堂下恭揖聽候訓諭蒙童挑背經書已作文者

挑講文理或現試文藝習繙譯者試以清文數行
并查每日課程簿冊蒙古亦然

一每年歲終該助教查明學生平日勤惰回堂甄
別量予去留

一官學生內有願讀清書者助教看其年歲稍長
文義粗通始准改學繙譯如新補到學未經讀過
漢書者不得遽行撥入繙譯館

一官學生文理荒疎經書不熟責成漢教習繙譯

平常清書生疎責成滿教習其蒙古語亦然馬步射生疎責成弓箭教習如官學生懶惰浮游功課不進者聽該教習責懲不服者革退

一官學生考取文生員繙譯生員如在學已滿十年者該助教帶領呈堂量予去留

一官學生有告假穿孝百日及兩月一月者出具本佐領圖記投遞本學該助教具稿呈堂存案例不停止錢糧功服以下送殯後上學

一官學生有告假隨任省親修理墳塋收取地租
省視親伯叔兄弟者量其路程遠近如離京四十
里告假在十日以內者取具本佐領圖記呈堂給
假其告假一月兩月者行文該旗暫停錢糧俟銷
假再行補復如過三個月即行旗開缺

一官學生有告假隨任回京及病痊呈請復班者
該助教帶領呈堂驗看資性年歲如尚可造就准
其遇缺坐補

一春秋丁祭官學生應在哲廡及

崇聖祠四配兩廡執事該助教自行挑派開送國子

監先期隨班演禮有不到者查明革退

一凡遇祭酒司業到任及封印開印助教各率官

學生到監行禮

一八旗新補入學助教同滿漢教習齊集學堂學

生行三叩頭禮起俟助教分撥定館其見本館教

習亦如之然後受業助教到任教習到館學生叅

見禮同

一咸安宮學生缺出由該學咨取到監將本旗滿洲官學生內揀選俊秀者數名咨送

一八旗滿洲蒙古漢軍都統舊設外郎缺出由該旗轉咨到監將本旗漢軍年久官學生內揀選一名咨送吏部

一八旗蒙古都統新設外郎缺出該旗咨取到監將本旗漢軍官學生內揀選滿漢兼優者一名咨

送

一唐古忒學生缺出由該學咨取到監將本旗蒙古官學生內考選能繙譯者數名咨送

一經咒館咨取蒙古官學生將能寫蒙古字者挑送

一凡下五旗包衣官學生不准挑選外郎唐古忒學生

一八旗官學生例不准挑補護軍馬甲拜唐阿及

別項差使

一八旗滿洲官學生准考庫使下五旗包衣官學生不准考庫使

附八旗學舍

一鑲黃旗官學在安定門內大興縣西圓恩寺衙
衙共房三十七間

一正黃旗官學在西直門內祖家街共房三十七
間

一正白旗官學在朝陽門內南小街新鮮衙共
房二十八間

一正紅旗官學在阜成門內巡捕廳衙共房四
十七間

一鑲白旗官學在東單牌樓之東象鼻子坑共房
三十五間

一鑲紅旗官學在宣武門內頭髮衙衙共房四十
八間

一正藍旗官學在東單牌樓之北新開路共房三十五間

一鑲藍旗官學在西單牌樓之北甘石橋馬尾衙共房四十間

謹案國子監例載凡八旗官學房屋牆垣有應修理處及每年糊飾頂棚窻格等工由該學助教具稿呈堂咨行各該旗都統自行估計修理

欽定八旗通志卷九十五

欽定四庫全書

欽定八旗通志卷九十六

學校志三

八旗官學下

謹案此卷專志助教教習選補之事

順治二年定酌取京省生員為八旗子弟伴讀每名月給米二斛以資贍養三年之內果教習子弟有成國子監咨行吏部叙用

十二年覆准撤回八旗教習生員令禮部會同國

子監嚴加考試於監生中充補如在監仍能教習
有成優加錄用

十六年題准教習既改用監生今後考選教習令
該監自行取用

十七年覆准考選教習止用恩拔副榜歲貢其准
貢例監不准考取

康熙三年議准八旗教習將在監恩拔歲貢貢生
齊集闕補

四年題准恩拔歲副俱停止補用教習應於官廕
准例監生內未經考職者考試補用

六年五月御史傅感丁疏言教習冒濫請嚴遴選
之法以後考取教習務將通曉經史原從文義考
取出身者方許充補如將文理不通之人冒濫考
取查出指名題叅經禮部議覆應先儘恩拔歲副
廕監生考取如無此項貢監生仍許將准例監生
考取

是年九月都察院左都御史王熙奏言將收滿洲之真才必先以教導之實事

朝廷興學作人既以鄉會試收羅之國子監教養之而於八旗官學諸生復選滿漢分旗教習儲才育士之道可謂詳且備矣近者欽奉

恩詔一時滿漢官廕監生入國學者倍多於前又部議各旗滿洲漢軍與漢人一體鄉會試業奉

諭旨則八旗廕監生應照漢官廕監之例從國子監應試

其八旗官學生亦應照漢人考取應試矣查漢監生入監必分堂撥班先以月課繼以季課教法甚備其八旗廕監生習滿書者原有滿官教訓其習漢書者似應一體分派漢博士助教等官設立課程定期稽查必使各習一經兼及史鑑詳為講解俾令貫通務期成才以收實用至於八旗官學生定例每佐領各二人而考取錄用之時少有學問優長者則漢教習監生誤之也查教習一項向於

恩拔歲副中考取近年恩拔歲副乏人而旁及於
納銀准例經御史傅感丁條議部議以恩拔歲副
無人仍用納銀准例此等當入監之時既不由於
考取及充教習之日自難責其優通已身學業尚
當在質疑問難之時為人師範豈能有成德達材
之益不過虛糜歲月覬博一官無怪乎徒存官學
之名而生徒無勤學之實也竊念納銀准例既不
堪用恩拔歲副人數又少何若於舉人中願就教

習者與恩拔歲副相兼考充此皆屢經考試之人較之納銀准例自不相同且舉人一項今既准其考授教授等官矣未有為漢生員師則有餘為官學生師則不足者也至於考取教習之法則應查照順治十五年以前之例禮部會同該監嚴加考選無止委之該監視為具文其八旗官學滿書既有滿司業助教等分旗稽查教習則習漢書者亦應派漢官不時親到官學稽查諸生之學業與教

金史卷之八十六
習之勤惰庶教學各有責成在國學者既善其法
在官學者復得其人將見英才蔚起於

朝廷儲才育士之大典或少有裨也奉

旨國子監為作養人材之地教習宜選用文理優長之人
復嚴加稽查督課乃得真才以後教習應作何考試選
取及分派博士等官向官學稽查勤惰之處俱著一併
定議具奏

尋禮部議八旗教習缺出舉人內有情願就旗下

教習者取具同鄉京官印結

如無同鄉在京印官即取該省藩司印結

按國子監與恩拔歲副官廕及例監一體考試遇缺出之日限五日內傳集應考諸人彌封試卷封門出論題二策題一即日取定不許預取多人與文理荒疎者充數如該監徇情考取不公者查出題叅議處其祭酒司業不時遣漢博士助教等官往官學稽查教習勤惰滿學生既有滿助教等管教不必交漢博士助教等官官學生除照常考試

外一年一次嚴考將八旗分別等第送部其學生
怠惰肄業甚劣者即開列該助教教習職名題叅
議處奉

旨依議

十二年覆准八旗教習先因停止恩拔歲副故將
官廕准例充補今選拔副榜歲貢既經議復應仍
照舊例令其考充教習其舉人官廕并准例監生
俱應停其考用

雍正元年覆准八旗教習應將考取之新進士用一人考取之恩拔歲副貢生用一人如此分缺間補三年期滿新進士即照例補用恩拔歲副貢生仍咨部以知縣用挨年銓選至捐納歲貢不准考充八旗教習

是年奏准於八旗蒙古護軍統領催驍騎校內有通曉經籍明白繙譯熟練國語蒙古語者選為蒙古教習共十有六人與助教一同教習蒙古官學生

四年奉

旨滿助教一官有教訓士子之責若只考字則雖年少不學但工繕寫者皆可入選可傳諭各部院衙門將滿洲筆帖式內為人老成有行止者保舉引見其應考繕譯者仍照例考試

五年奏准繙譯舉人准其與八旗文舉人副榜貢生一例考試取補助教

是年十月康熙王果郡王議覆國子監祭酒孫嘉

淦條奏官學生習漢字者每旗設教習貢生五人
輪流更換功課難以稽查應令每教習名下各派
定學生若干人日處其中專心訓導則將來成否
責有攸歸查景山現有漢教習十二人每名一月
關銀二兩米隨錢糧每年夏秋衣服各一套二年
皮衣服一套每日隨用肉菜煤炭等項該衙門領
給今八旗教習既不許其分班更換則應足其衣
食除每日薪蔬難於支給不必比照景山外其每

年銀米等項俱應均照景山之例則衣食充裕而課讀自勤矣至教習期滿議叙國子監舊例皆用貢生三年期滿咨部以知縣候選伏思三年之內若不問其勤惰槩行咨部銓選恐有草率塞責希圖僥倖之弊嗣後八旗教習入館國子監堂官不時稽查如有懶惰者即斥退不准議叙其勤謹無過者三年期滿照例咨部以知縣候選如有善於訓誘精勤不倦者再留教習三年俟六年期滿咨

部以知縣即用如此則勤惰有分而善於誨誘者亦得久於其職矣奉

旨所議是依議

六年吏部議准蒙古助教缺出於理藩院修書處蒙古筆帖式並國子監閒散巴克什內揀選皆由理藩院國子監兩衙門辦理擬定正陪咨送吏部帶領引

見補用

又議准蒙古教習缺出咨明理藩院挑取過監充
補照例移咨原旗及護軍統領衙門停止差使其
應得錢糧仍於原處給領

十三年奉

上諭助教一官專司訓迪必得老成謹慎之人方為有益
嗣後年少者不准考試

是年吏部議定助教一官必年過三十者方准考
試

乾隆八年奏准官學漢教習每人給印冊二本該教習將三年內所教學生若干名並學業功課詳細填注俟期滿時一冊交新教習收存照例填注一冊呈送本監堂官察覈慎重分別如有實心訓課著有成效者列一等其訓課勤謹稍獲成效者列二等出具考語繕單引

見一等者可否用為知縣並二等者或用知縣或用教

職恭候

欽定仍歸原班銓選其列一等者仍照原議令在學再行教習三年果實心實力始終如一再將教習成效叙入摺內再填考語引

見准以知縣即用

十年奏准嗣後蒙古教習酌以五年期滿由國子監詳加考覈實不能教導者斥令歸旗當差如有為人明白實心訓課者分別等第填注考語引見其奉

旨記名者以應陞之護軍驍騎校補用仍留在學行走
由監行文該旗遇有員缺與在旗應陞人員分班
間補

十一年奏准滿洲助教員缺除舉人及恩拔副歲
貢生仍照舊考試外其現任筆帖式等止准舉人
及恩拔副歲貢生生員出身之筆帖式坐補至考
試時於請繙譯題一道之外再請漢文論題一道
欽點大臣嚴加考試如果清漢兼優方准錄取引

見充補教習

十五年奏准考試滿助教准多取數人咨呈吏部

一同引

見俟記名後遇有員缺挨次補用

十六年向來官學漢教習員缺由監臣將肄業之恩拔副優歲各生考取充補嗣後先期請

命大臣一二人至監會同監臣公同考取將試卷彌封

詳閱

十七年奏准八旗世爵既經於兩翼設立官學將現在官學肄業之世爵子弟咨回各旗外所有八旗官學各增設之漢教習一人相應裁汰教射教

習亦咨回本旗

謹案增設世爵教習係雍正十三年侍郎鄂善所奏自乾隆十七年

裁汰後至三十一年即以此八缺改設滿教習每學一人

又奏准教射教習既經咨回則每學教射未有專員查蒙古教習每學現設二人蒙古學生止二十人內又有他處行走例不開缺者實在不過十數

人無庸二人教習嗣後止以一人教習字話以一人教習騎射行文該旗遴選語音嫻熟弓馬可觀者充補

十八年奏准蒙古助教現在兼用蒙古進士其滿洲進士出身之現任筆帖式一體准其考試

又奏准滿洲蒙古助教所司各異蒙古助教無滿洲人員充補今考試滿洲助教其蒙古人員無庸收考

三十一年奏准每旗裁去漢教習一缺添設滿教習一缺專訓繙譯照考試覺羅滿洲教習之例由國子監請

旨考試用繙譯題一道其應給公費衣服等項即以裁去漢缺之項給與其有原食錢糧及現任食俸者毋庸重給

三十二年奉

上諭嗣後現任

陵寢筆帖式不准考試助教俟年滿回京後准其考試

附國子監現行則例

- 一八旗官學每學額設滿洲助教二員滿洲教習
- 一人漢教習四人掌教滿洲漢軍學生蒙古助教
- 一員蒙古教習一人掌教蒙古學生弓箭教習一
- 人掌教合學學生騎射凡有關於學務者皆助教
- 所職掌

一國子監先期行文八旗將滿洲蒙古漢軍文進

士文舉人恩拔副歲貢生文生員繙譯進士舉人
繙譯生員及廢員造具旗分佐領年貌履歷清冊
咨送到監行文各部院咨取筆帖式清冊與此同
一滿漢教習缺出需人由八旗滿洲蒙古漢軍將
前項人員年逾三十歲者咨送國子監奏請考試
一滿洲教習有原食錢糧及現任食俸之筆帖式
充補者已食有糧俸毋庸給與教習銀米其原未
食俸及錢糧者照漢教習例給發

一滿洲教習三年期滿由國子監查明平日勤惰及成就學生名數分別等第出具切實考語帶領

引

見後咨明吏部辦理及各旗查照

一滿洲教習報滿核計三年中成就學生在四名

以上者准其報滿不及四名者不准報滿

一教習考取後而鄉會試中式者仍准充補已補

而鄉會試中式者亦不開缺

一教習丁憂病故應給賙助銀兩與肄業諸生同
一八旗教習照

景山教習例每年夏季應領紗袍褂各一件緯纓涼
帽一頂秋季應領緞綿袍褂各一件二年應領皮
衣一套靴帽各一副由國子監咨明工部照例給
發

一八旗官學所有存貯書籍該助教查明新舊年
月卷頁造冊用堂印敬謹收貯隨時督率皂役曬

瞭以防蠹蝕如有缺爛呈堂領補至教習及學生
領讀之時該助教隨時檢發登記簿冊限日繳還
遇有離任事故查明有無損失照冊交代

以上八旗官學

欽定四庫全書

欽定八旗通志卷九十七

學校志四

宗學

覺羅學

咸安宮官學

景山官

宗學

順治九年十二月工科副理事官散都疏請每旗各設宗學每學用學行兼優滿漢官各一員為之師範凡未封宗室之子年十歲以上者俱入宗學有放縱不循禮法者學師具報宗人府小則訓責

大則奏聞其親王世子郡王亦應選用滿漢官各一員講論經史貝勒以下俱應勤加講閱以昭成就宗室人材之意得

旨每旗設滿洲官教習滿書其漢書聽從其便

十年三月散都又疏言親王應各設在部博士滿洲進士漢軍進士各一員頂帶照騎都尉世子應各設在部筆帖式滿洲進士漢軍進士各一員頂帶照雲騎尉郡王應各設在官學閒散滿洲進士

漢軍進士各一員頂帶照博士如滿洲漢軍進士
不足於舉人內考用舉人不足於各王護衛內選
用親王郡王等滿十歲然後設立師傅宗室八學
各設滿洲生員一員頂帶照筆帖式各員六年滿
後考取優者錄用

詔從之

康熙十二年題准王以下入八分公以上子弟年
滿十歲者於本府講讀經史諸書

二十四年議准宗室子弟令延文學優贍者在各府第精專學習

雍正二年立官學於宗室內揀選分尊年長者四人令其教習

諭之曰朕惟睦族敦宗務先教化特立義學揀選爾等教習隨其資質勸學興行有不遵教訓者小則爾等自行懲勸大則揭報宗人府會同奏聞其行止端方精勤好學者無論年齒長幼即行保奏從來立教之術莫要於

獎善懲惡善不獎不能使之勸惡不懲不能使之改爾等既膺簡任務期勤慎黽勉恪共厥職以副朕篤厚宗親殷勤教育之至意

又覆准左右兩翼官房每翼各立一滿學一漢學王貝勒貝子公將軍閒散之十八歲以下子弟除在家自讀者悉聽外其在官學子弟或清書或漢書隨其志願分別教授十九歲以上已曾讀書之宗室有願讀書者亦聽其入學其教授人員於各

部院司官中書內揀選四員每翼分與二員令教習清書禮部揀選教習四員每翼分與二員令教習漢書至騎射亦屬緊要兵部於閒散官及護軍校護軍內揀選善騎射者四員每翼分與二員於官學內修一箭道讀書之暇教習騎射以

欽選之宗室四人為正教長宗人府選十六人為副教長如正教長缺出即擇副教長補授令伊等輪流值日不時勸勉教習禮義每月考試一次將學業騎

射優者平常者不及者分別等第申報註冊每春秋二季宗人府親試其學業優長騎射出衆者舉
奏引

見其值日教長月給銀三兩米三斗讀書子弟月給銀米
同更按月各給川連紙一刀筆三枝墨一錠自十
一月朔至正月晦各給炭百八十觔自五月朔至
七月晦每日給冰一塊教習清書之司官中書仍
領該部院公費其教習漢書者照國子監教習例

每月給米兩斛三十六月滿時咨送吏部照例補用其教習騎射者每月給銀一兩所應給銀米筆墨紙炭冰塊行文該部支給所立宗室學房宗人府親閱應修之處派官料估領取工部錢糧修理至教習五年稱職舉其勤宣訓化實蹟保奏仍賞正教長每員緞四疋副教長每員緞二疋教習清書官員行文該部院議叙教習騎射人員交該旗以應陞之缺即用有不稱職者指叅

乾隆三年議准兩翼宗學設立總稽課程各二人
以滿漢京堂官充之

七年十二月奉

上諭我朝崇尚本務原以弓馬清文為重而宗室誼屬
天潢尤為切近向來宗室子弟俱講究清文精熟騎
射誠恐學習漢文不免流於漢人浮靡之習是以順
治十一年六月欽奉

世祖章皇帝諭宗人府朕思習漢書入漢俗漸忘我滿洲

舊制前准宗人府禮部所請設立宗學令宗室子弟讀書其內因派員教習滿書其願習漢書者各聽其便今思既習滿書即可將繙譯各漢書觀玩著永停其習漢字諸書專習滿書爾衙門傳示所以敦本實而黜浮華也近因雅爾哈善條奏設立宗學以漢文教習宗室子弟迄今已歷數年昨經考試並無佳卷即繙譯卷亦屬平常朕非過求文字出色其實在明通者實難其選即所取二三人不過於其內就短取長文理稍順

而已尚恐未必盡出心裁或不免彼此商確湊集其
於造就之方究無裨益也但既經考試著宗人府將
所取之人照例帶領引見嗣後宗室子弟或有不能
學習漢文者應聽其專精武藝其在宗學肄業者考
試之時更應益加嚴肅至宗室進身之階原有襲封
世職又可揀選侍衛及護軍叅領等缺與其徒務章
句虛文轉致荒廢本務不如嫻習武藝崇實黜浮儲
為國家有用之器也可傳諭宗人府將此旨明白曉

諭宗室人等知之

八年三月禮部帶領宗人府考取之宗室玉鼎柱等引

見奉

旨考取之宗室玉鼎柱達林圖福喜俱准作進士與乙丑科會試中式之人一體殿試引見或選入翰林或以部屬等官補用候朕臨時降旨嗣後俱照此例行
十年七月稽查右翼宗學通政司右通政熊學鵬

奏言右翼宗學共設滿漢教習九人凡在館學生
滿漢文藝之優劣教習人員訓課行走之勤惰皆
應不時考核今稽查右翼宗學係臣與光祿寺卿
沈起元二人俱係漢官於繙譯素未通曉請再派
滿洲文臣一員公同稽查奉

旨著派開泰

二十一年奏准裁宗學漢教習九人改為繙譯教
習

以上宗學

覺羅學

雍正七年奉

上諭八旗內覺羅佐領或有或無向未畫一今既將下五旗覺羅佐領由各王屬下撤出作為公中佐領朕意均派八旗方為妥協前者宗人府設立宗學祇令教習宗室尚未及於覺羅覺羅人衆今若一槩歸併宗學教者勢難遍及應每旗各立一衙門管轄覺羅或王或公派

委一員統理令於各旗覺羅內揀選老成練達品行端
方者一二人分管即於該旗衙門之旁設立一學除情
願在家學習者外擇其可教之人令其讀書學射滿漢
兼習所派出之管轄人員不時訓誨稽察如內有行止
不端不知守法安分者即回明宗人府王等令在該旗
衙門居住學習禁止出門俟其改行遷善之後再回明
宗人府王等始許出門年底彙疏具題如此則於覺羅
少年子弟大有裨益而人人皆可成就著宗人府王公

等會同滿洲大學士六部尚書詳悉議奏

是年十二月宗人府王公滿洲大學士六部尚書

議覆我

皇上敦宗睦族俯念覺羅等雖世系稍遠亦出自

天潢是以由該王屬下撤出置之公中佐領茲又

特命將七旗所有之覺羅佐領均之於八旗每旗各設一

學令其讀書得以成就

恩德實為備至查七旗所有覺羅佐領共三十二分鑲黃

旗七分正黃旗五分正白旗無有正紅旗七分鑲
白旗五分鑲紅旗四分正藍旗二分鑲藍旗二分
今應就便視其可移者每旗置為覺羅佐領四分
將鑲黃旗七佐領內之佛保永昌阿堵鑲白旗之
海蘭此四佐領移置正白旗正藍旗惟有覺羅佐
領二分將鑲藍旗之永祿同保住此二佐領移置
正藍旗共成四分將正黃旗之東武立正紅旗之
得進圖爾得赫瑪喇熙此四佐領移置鑲藍旗再

八旗各擇官房一所立為衙署旁設清漢各一學
八旗覺羅內自八歲以上十八歲以下子弟俱令
入學讀書其中有情願在家讀書者聽其自便其
入官學讀書者清漢隨其所願而教之如十八歲
以上已曾讀書而又願入學讀書者亦准其入學
至十八歲以上未曾讀書者不可竟無教訓於每
月朔望傳集該旗公署宣講

聖諭廣訓總管一旗覺羅之王公由宗人府將王公職名

開列奏請

欽點每旗派覺羅二人以為督教之長即交委出之王公會同宗人府王公務擇其才品能管轄人者挑取由各部院現任筆帖式內擇其老成能繙譯者揀選八人每旗各分一員教授清書由禮部揀選教習八人每旗各分一員教授漢書再行文兵部將現在十五善射或已退之十五善射內無論官兵揀選八人每旗各分一人令其教射於學舍院內

修一習射之地令覺羅等於誦讀之暇兼以習射
所選督教之長十六人令其每日在學行走讀書
之覺羅等有怠惰不學者各學之長即嚴加訓飭
若不悛改即回明管轄之王公嚴加訓責如有甚
劣者報知宗人府拘於本旗衙署內教訓不准出
外行走即不讀書之覺羅內有行為妄亂者亦拘
於衙署之中教訓不准出外行走俟痛加悛改後
告知宗人府始行放出由宗人府彙集奏

聞再讀書之覺羅等若不時加考課則優劣不分無以懲
勸令該管之王公等於每年春秋二季親身考驗
分別等第報知宗人府登記檔案如所學之書及
騎射俱優者奏明引

見擢用則劣者自知弔勉效法各加奮勵而學業可成矣
至讀書之覺羅及督教人等每月各給公費銀二
兩其米石紙筆墨水炭等物俱照宗學之例行文
各該部領取教清書之筆帖式教漢書之教習亦

照宗學之例教習三十六個月期滿行文吏部照例補用如懶惰不勤者咨送該部革職如有多教三年者將其多教之處一併咨部議叙再各學之覺羅有進文生員及繙譯生員至四人者將教清漢書之教習亦交部議叙其教射之人照筆帖式給與公費其衙署學舍著各旗揀擇足用之官房一所委員會同覺羅學長估計領取官租銀修理報部核銷再每旗挑馬甲各二名以為傳事之用

覺羅等讀書五年如果成就多人著宗人府詳查
奏

聞將該管之王公議敘派出之學長等如果勤慎教導令
該王公報知宗人府另行保奏教射之人俟過五
年以應陞之缺即用如怠惰不勤即叅奏治罪如
此則教習各勤於訓導而讀書之覺羅學業可成
矣奉

旨依議

以上覺羅學

咸安宮官學

雍正六年十一月奉

上諭咸安宮內房屋現在空閒看景山官學生功課未專於內府佐領管領下幼童及官學生內選其俊秀者五十名或百餘名委派翰林等即住居咸安宮教習彼處房屋亦多且有射箭之處其學房住房爾等酌量修理著令居住再挑選烏拉人幾名於伊等讀書之暇令

其教授清話弓馬伊等皆係幼童有欲帶僕人者准各帶一人幾日後著回家看往一次如是訓導其上進之子又加勤學庶可收堪用之材至伊等所需飲食紙筆弓箭等物並騎射之駕馬作何官給之處爾等妥議具奏

七年四月總管內務府議奏臣等欽遵

諭旨於景山官學生佐領管領下自十三歲以上二十三歲以下之幼童看其俊秀可以學習者選得九十

名於

咸安宮內酌量修理讀書房屋三所每所各分給三十名令其讀書其教習著於翰林院官員揀選厚重者九人具奏每所派三人令勤加教授其教清話弓馬之人臣等於烏拉人及舊滿洲內挑選善教授者九人亦每所派三人於讀書之暇著令教授學習諸生年歲大小不同可學習步射者著在咸安宮門前閒地教以步射可學習騎射者酌量時

宜教以騎射

紫禁內地關係緊要應令諸生清晨入學日暮散歸如遇雨水祁寒之際教習學生有情願在內者即著宿居學內管理學房事務揀選內府官四員奏令專管應於掌儀司太監內選其老成者三人夜間巡察火燭所派太監即令管理學房官管轄其教習等如果教授有方諸生之學業可觀三年一次查勘將翰林等交部議叙教清話弓馬之人以

應陞之缺陞用倘有疎懈怠玩不悉心教授者臣等指名題叅學生內有滑懶不肖者革退另選查景山滿漢教習除官給飯食外無俸之教習每人月給銀二兩漢教習各給住房二間每年給緞紗衣一套三年給緞面羊皮袍褂一套今選取教習等所食俸銀及官給飯食衣服應均照定例其翰林教習之住房於附近官房內撥給學生飯食照該班護軍之例除給與官米外每日每人用肉菜

銀五分按月由內庫發給看管飯食及做飯使令等項於管領下領催蘇拉內酌派

咸安宮門外西邊所有房屋撥給數間以為做飯之處所讀之書所需之筆墨紙張弓箭器皿騎射之駑馬鋪用蓆毡溫炕木柴煖手黑炭等物委官計算數目向各該處領取臣等仍不時身往稽察

皇上命下之日行文翰林院揀選翰林欽天監選擇吉日令學生入學讀書可也奉

旨依議

十二年五月翰林院侍讀學士保良奏言我

皇上加恩內府子弟特設

咸安宮官學漢教習教以文義滿教習教以清書弓

箭又

賜以紙筆飯食等物無非作養人材之至意也諸生沾被
皇恩專心肄業自雍正七年七月開學以來迄今五載除
新補學生外內有中式舉人副榜者四人有考中

生員補廩者二十三人有兼習清書稍知繙譯者
十三四人其餘雖質學不等然皆畧明大義弓箭
俱有可觀但諸生學習日久年紀漸長二十以外
者十有四五若不限以年分考試別其優劣無以
示勸懲查宗學有五年一次考試之例今立學已
屆五年伏祈

皇上派員考試別以等第其年紀尚幼質堪成就者仍留
學內讀書其年紀長成考在上等與考在下等均

應作何發落令考試官考後請

旨嗣後或三年一考或五年一考著為定例永遠遵行如
此不惟學生知所鼓舞儆戒而滿漢教習之勤惰
優絀亦可因此而見矣奉

旨內務府總管等議奏

九月總管內務府議照宗學例五年考試一次除
陸續後進學生不能應考者不令其考試外其應
考學生令管理官學翰林官查明送考其考試官

由吏部開列職名奏派大臣一員司官一員內務
府司官一員分為三日考試第一日考試漢文擬
以四書二題第二日考試繙譯楷書清字擬以

上諭一段第三日考試騎射步射其考場清漢文在掌儀
司衙門騎步射在正黃旗侍衛教場其監察官員
派內府護軍統領一員護軍叅領二員酌派護軍
查看其所需桌張紙卷等項臣衙門派員料理其
考試之學生定為三等一二等由考試官具奏作

何錄用請

旨定奪三等者仍留學肄業其年長質愚不能上進者即行革退又查得雍正十一年二月內將年滿教習等具奏奉

旨咸安宮景山教習疎懶怠忽不實心訓課者居多爾等將現今年滿實在勤慎者揀選帶領引見其餘仍令効力三年嗣後若不實心訓課即行叅奏重處將此旨傳諭兩學官員教習等知之欽此臣等謹遵

諭旨漢教習內三年期滿如果實心訓課行走優勤者臣
衙門出具考語咨部引

見以應陞之缺補用其訓課平等者三年期滿仍留三年
俟六年期滿照依此例補用如不實心訓課者臣
等即行叅奏其教清話馬步射之教習五年期滿
教授盡心行走勤慎者於應陞之處列名不及者
革退另選其不盡心教授者叅奏重處如此則勸
懲兼施誘勵備至學生等自必羣知奮興以歸於

上進之途而教習等亦不至有草率偷安之弊矣
請以此著為定例永遠遵行抑臣等更有請者

咸安宮教清話馬步射之教習原設九人今學生內
既有稍知繙譯之人應請於九缺內扣除三缺改
補繙譯教習三員此繙譯教習請照八旗助教之
例由部考取三員令教繙譯清書五年期滿交部
議叙奉

旨依議

乾隆三十四年二月總管咸安宮官學教習邁拉遜叅奏教習等怠惰曠功一摺奉

上諭所有咸安宮稽查教習之張曾敞等著交部察議至觀保管理官學日久並不實力整頓以致教習人員怠惰曠功若此若非邁拉遜查出叅奏觀保尚在睡夢中觀保著交部嚴察議奏

以上咸安宮官學

景山官學

康熙二十五年

特命建設官學於北上門兩旁共給官房三十間滿官學
三房漢官學三房每房給桌二十張櫈十五條自
五月初一日起至七月三十日止每日給冰一塊
自十一月初一日起至正月三十日止每日給炭
二十斤中間十二月二十七日起至正月十六日
扣除散學二十日不領六房牕戶著落內管領每
年十一月內用毛頭紙糊節

是年議定景山官學生於內佐領內管領下選取
三百六十六名

又議定教習額數清書每房設教習三員漢書每
房設教習四員

又議准生員內有善於訓導願為教習者選擇移
送各給衣食令教習三旗子弟

又議定生員教習六年限滿以教諭即用其由官
學內中式舉人副榜及捐貢之教習俱以知縣用

又奉

上諭內廷執事人閒散人內老成堪為師長者不分滿洲

蒙古漢軍著挑選九名教滿書

二十九年奉

上諭內閣中書內善書善射者揀選三名教滿書仍照常

陞轉

三十一年議定於新添內管領三員下增選官學

生定為三百八十八名

三十四年奏准於新添滿洲佐領七員漢軍佐領六員內管領三員下仍挑選官學生三百八十八名官學生缺額即於新添佐領內管領下均勻選取

三十八年議定停止官飯每月每人給公費錢一千文

五十二年奉

上諭於新科進士內揀有年紀者選取三名教習照常陞

轉

是年議定進士教習期滿陞用內閣中書

雍正元年議准將

御筆尖圈記名新進士挨次充補教習

是年題准官學生三百八十八名俱於佐領內管
領下閒散人挑取

又議定教習六年期滿果官學生成就多者將中
書等具題咨送吏部以應陞之缺即用內教習等

亦以應陞缺即用

又奏准停止公費仍給官飯教清書中書三員內
教習六員亦照漢教習例

又定官學生內生員每月給紙筆銀一兩隨本佐
領關給

三年議定教習員缺由禮部向吏部咨取候選舉
人向國子監咨取恩拔歲副貢生

欽點大員考試選取三年期滿咨送吏部以應陞之缺

補用

十二年九月總管內務府議奏景山官學設立教習係一體給公費飯食誠為優渥學生等考試舉人生員筆帖式及挑選護軍披甲等差無不沾被皇恩但學生之優劣教習之勤惰亦當詳加考驗示以勸懲請照現定

咸安宮官學之例令管理景山學官將應考之學生開送一同考試試官分別等次另摺具奏考在一

二等者臣衙門另行請

旨其滿漢教習亦照例分別錄用奉

旨依議

附會典所載則例

景山官學額設人役滿漢六房每房灑掃閒散人

二名看房人一名

教習廩給內教習食執事俸米中書教習食中書
俸漢教習每人給官房兩間每日給白米七合五

勺猪肉一觔及鹽油菜蔬等物每月給銀二兩連
米俱於漢軍佐領下關領每年夏季給官用紗袍
褂各一件絨纓帽各一頂秋季每人給官用緞棉
袍褂各一件三年給官用緞面羊皮袍褂各一件
皮帽一頂皮靴一雙毡襪一雙滿漢教習每年各
給水筆二十四枝墨一兩二錢

以上景山官學

欽定八旗通志卷九十七

欽定四庫全書

史部

欽定八旗通志卷九十八至一百一

欽定四庫全書

欽定八旗通志卷九十八

學校志五

世職幼學

清文學

教場官學

蒙古

語學

算學

八旗義學附

盛京八旗

官學

黑龍江官學

世職幼學

雍正七年閏七月八旗都統議覆都統奇爾薩所

奏未及年歲尚未上朝之佐領世職人員俱著義

學肄業等語伏惟我

皇上振興文教加恩八旗命每旗各立義學將閒散幼穉俱令讀書已咸被陶成矣臣等請照都統奇爾薩條奏將八旗滿洲蒙古漢軍內有未及年歲尚未上朝之佐領世職人員亦俱令入義學肄業其不在本旗地方居住者令都統將伊之佐領並職名出具印結移咨現住之旗分都統著就近入彼旗義學

謹案義學於乾隆二十三年裁汰而兩翼別設世職新學詳本卷後如此則日

後上朝於辦理任內事務亦屬有益奉

旨依議

乾隆元年議准八旗世爵年二十以下者分撥各旗官學一同教習三年期滿該旗大臣逐加考試分別等第引

見錄用每學各增漢教習一人各撥教射教習一人其應給月費等項照例支給

三年奏准八旗世爵在官學學習三年期滿引

見錄用其雖滿三年而年未及二十歲者仍留讀書俟

滿二十歲後再行請

旨考試

十七年五月奉

上諭近來八旗世襲官多有不習清語騎射流於不堪者此皆由自幼襲官食祿不思上進只求安逸該都統亦不勤加教誨之所致也此等官員皆伊祖父所立至伊等承襲時因年歲未及安居無事不勤正務任意流弛至於無用若給與差役行走伊等尚可成

就但該旗之差役無幾至挑選侍衛竟有求情不到者著將伊等分入八旗護軍營在叅領護軍校護軍上相兼行走令其習學騎射騎射果好奏補實缺如此可為成就幼年之道其如何擬派差役坐補陞用留旗當差之處交軍機大臣會同八旗都統前鋒統領護軍統領等合議具奏尋會議奏言我

皇上念世襲官員耽於安逸恐至無用著將伊等分入八旗護軍營量其品級擬與差役令其學習武藝

實成就世職官員

仁厚之至意也臣等查得八旗世襲官員內除大臣侍衛部院衙門各營及別項差役行走人員外其餘看守倉庫城街火堆等項官差卽世職較多之旗分足分為三班若遇有告假患病隨圍等故卽不足三班若將本旗原有職官移給別項差務則旗員之差役似覺過密只有恩騎尉一項係

皇上特恩增設之員未增此項世職之前旗員差役原

無不數查得現今在旗行走之恩騎尉共一百六十餘員即照此數將世襲官與恩騎尉一并挑選挑選時臣等會同領侍衛內大臣前鋒統領護軍統領詳細察看將其可學騎射清語者令戴空藍翎在侍衛上行走果有行走勤慎騎射清語可觀者挑侍衛時指名帶領引

見補放如有不習騎射清語當差懶惰者若將伊等駁回本旗反遂其好逸之願請交該管大臣叅奏革

職其餘官員交前鋒統領護軍統領三品以上者
著在副護軍叅領上行走四五品者著在委護軍
叅領行走六品者在護軍校上行走七八品者在
委護軍校上行走若有勤學騎射清語當差勉力
者以副護軍叅領委護軍叅領護軍校補用如有
當差雖勤而騎射清語不能長進者駁回本旗當
差如有差不力又無長進者即行叅奏革職將本
身世職另行襲放如此則世襲官員皆知奮勉有

志者既得上進而於旗員差役亦不至有碍矣再
八旗年歲未及之幼官坐食半俸併無行走學習
之處雖有入學讀書之例而入學者甚少此等幼
童或驕養過甚不習武藝或自謂身已為官恣意
妄行或比匪為非故至長大時賢者少而不肖者
甚多臣查得年歲未及之幼官共一百七十員若
特派大臣教誨多有可成臣等詳細議定兩翼各
設二學將米局現有官房交該部作速修理分給

至管學之員請將頭二品大臣職名請

旨指派所有修理房屋添設教習學內應用煤炭冰水等項交該管大臣查例議奏八旗幼官內十歲以上者應令入學習清語騎射俟三年期滿管學大臣請

旨派王大臣考驗清語騎射擬定等第頭等者帶領引見恭候

聖裁或以部屬或以侍衛用二等者交該旗印房行走

或對品陞用三等者仍給半俸留學俟三年期滿
考驗若仍無長進則教亦無益此等廢材請即行
革職將應有世職另選應襲之人承襲如此則八
旗世僕皆獲黽勉之途有用之材可望多覲矣奉
旨依議嗣後年幼襲官之人至十歲以上即照此例令
其入學所有在侍衛處護軍營行走者俟朕木蘭回
鑾後親身考驗將此先行曉示令伊等各知奮勉如
臨時仍有不能射箭者即照所請革職

是年管理左右翼世職官學大臣議奏臣等將八旗米局酌量就近之處鑲黃正白會立一學鑲白正藍會立一學正黃正紅會立一學鑲紅鑲藍會立一學每翼派叅領二員輪流稽察所有學務令其管理每學派領催二名馬甲八名分作三班聽候差遣傳事臣等不時到學考察庶不至於怠惰廢弛矣至於挑取滿教習查漢軍義學例在該旗滿洲閒散官員筆帖式或革職降級人員內挑取

每月給銀二兩若無米石者折給米價銀一兩今
幼官學教習請照例於每翼挑取四人每學分設
二員均給公費其教習騎射之人在護軍校驍騎
校前鋒護軍內每翼各選四人照國子監助教例
每月給公費銀一兩五錢如果教導有方俟三年
期滿交部議叙不善教誨者即將該員駁回本旗
係職官則交部察議兵丁則鞭責革退又原奏內
有領給冰炭一項但支領冰炭等物車馬煩冗請

每月改給公費銀四兩以爲冰炭茶水之用所有
經費均於八旗官房租銀內輪流動用年終奏銷
奉

旨知道了

是年奏准八旗世爵既經於兩翼設立官學教導
將現在官學肄業之世爵子弟咨回各旗所有八
旗官學增設之漢教習一人相應裁汰教射教習
亦咨本旗

三十八年四月奉

上諭據范時綬奏稱現在官學讀書之鑲白旗滿洲恩騎尉倭什洪額素日庸愚懶惰教習等欲加責懲詎倭什洪額即以小刀自傷頭顱請將倭什洪額革職交該旗養傷俟平復時嚴加管束所遺恩騎尉另選承襲等語設立官學今年幼世襲官員在彼學習清語騎射原係造就伊等之隆恩倭什洪額素日並不上緊學習而教習等欲加責懲伊竟不服從反用小

乃自傷額顱甚屬無恥倭什洪額身係滿洲世職宜如是況恩騎尉一官原因伊祖先所得世職襲次已滿朕復念彼勞績特恩賞給正宜感激朕恩上緊學習而反甘自暴棄實屬不堪若不嚴行處治何以炯戒滿洲世僕著將倭什洪額革職銷除旗籍發往黑龍江所有恩騎尉停止承襲其管理官學之大臣章京教習等著交部分別察議並將此通諭八旗知之

以上世職幼學

清文學

雍正七年九月禮部議覆副都統劉汝霖所奏八旗漢軍各在就近地方選擇官房十數間立一清文學於滿洲間散官員內擇其人品端方通曉清文者二人以充教習將佐領下無力延師之人揀選入學讀書再令本叅領不時稽察其中有文理精通者於各部院考取繙譯時許本旗咨送以備

考用其粗能通文射箭者即在本旗挑補領催馬
甲以備抄錄檔案之用至於所選教習果能實心
効力教導有方請

旨交部議叙等語查八旗漢軍都統辦理事務用清文之
處居多漢軍子弟學習清文甚屬緊要若不另設
清文義學專司教訓而漢軍子弟清文生疎一切
書寫事件恐致錯誤應如劉汝霖所奏令八旗漢
軍各在本旗近地設立義學一所於每佐領揀選

一二人入學專習清文其教習交與滿洲都統會
同漢軍都統於滿洲間散官筆帖式或因公誥誤
人員內擇其精通清文堪以管教者二人充補又
於漢軍本旗內選善射者一二人乘子弟之暇教
習射箭其所選教習官則月給公費銀二兩若閒
散人則月給錢糧二兩米二斛其米石折銀俱在
漢軍本旗公費銀兩內給與再令本旗叅領不時
稽察課業如子弟文理精通情願考試繙譯者吏

部考取筆帖式時即閒散人亦准其具呈送考其
粗能通文射箭者即在本旗挑補領催馬甲以備
抄錄檔案之用如有志上進願仍在義學肄業各
聽其便該旗不得勒令挑補領催馬甲倘教習等
視為具文不盡心教導本旗查出題叅如果勤加
教誨三年內子弟能熟清文本旗分別等第請

旨交部議叙如此則漢軍皆嫻熟清文射法而我

皇上作養之恩益溥徧無既矣奉

旨依議選擇教習人員著帶來引見

十月八旗王大臣議覆叅領阿魯所奏每甲喇請
立一清文學舍除大臣官員子弟情願在家學習
及官學讀漢書者外其十二歲以上餘丁俱令入
學習清書騎射教導倫理等語查滿洲佐領下餘
丁雖俱交能清文之領催馬甲等教訓並未立有
學舍應如阿魯所請每甲喇立一學舍教訓除漢
軍餘丁已照劉汝霖條奏立學外其滿洲蒙古旗

分請於旗下官員內每甲喇選擇五間令為學舍
若該旗無房於他旗附近之房選擇五間立為學
舍於每旗前鋒護軍領催馬甲內挑老成通曉清
文能教訓者二人令為師長除大臣子弟願入官
學義學讀漢書及在家學習外其十二歲以上餘
丁俱令教清文清語每甲喇或章京或驍騎校派
出一員令教導倫理騎射其蒙古旗分亦照此設
立學舍並教以蒙古語該叅領不時稽察臣等亦

不時稽察一年一次考試其教訓好者官員則給以紀錄兵丁則記檔遇應陞之處送名若不以事為事教導惰懈者官員則題叅察議兵丁則革退另選如此則餘丁皆得仰沾

皇恩不數年間俱得成就矣奉

旨依議

十二年議准清文學年滿教習分為三等其所教子弟內有能考中繙譯外郎筆帖式者作為頭等

交部議叙所教子弟雖未有考試之人有能寫清字楷書併粗通繙譯者將該教習作為二等再留學三年如所教子弟止能寫清字併粗通清語者作為三等撥回原處

乾隆三年議准八旗漢軍清文教習年滿者所教子弟肄業果優有能考中繙譯外郎筆帖式繙譯生員者作為頭等仍照原議交部議叙若雖無考中之人尚有能寫清字楷書併粗通繙譯及通曉

清話者為二等照原議留學三年若所教之人並無粗曉繡譯清話又不能繕寫清字楷書是該教習並不實心教誨係現任筆帖式閒散官充當者即時交部查議係廢員充當者即時駁回永不叙用仍嚴飭稽察之叅領官不時查報

二十三年奉

旨裁去八旗義學此項八旗清文學仍行存留遇有教習缺出仍照例奏請補授遇有考試貼寫中書筆

帖式繙譯謄錄等項其義學內學生仍准一體考試

以上清文學

教場官學

雍正元年九月八旗都統議奏查八旗教場蓋造房屋令貧乏兵丁居住每月每旗派叅領一員在教場居住稽查飲酒賭博等事兵丁有犯將該叅領照例治罪茲因日久未免漸弛請嚴行稽查倘有疎忽從重議處至教場內居住兵丁無力延師

教訓子弟應於各教場俱設一學該旗選擇老成
善清書騎射者二人令其教習各都統等揀擇地
方交部造房五間以為學舍如此則教場兵丁子
弟俱有肄業之所庶可仰副

聖主教育滿洲之至意也奉

旨依議

十年奉

上諭圓明園兵丁朕從前未經細看此次大閱細看沿途

站立管道之兵丁氣象較前甚優圓明園之八旗及內
府三旗賞給教習令伊等子弟學習漢書著果親王等
議奏

是年四月果親王允禮等議覆八旗及內府三旗
營房向因地勢建造故相隔遠近不一今蒙

聖恩設立學舍當視營房之遠近建造查鑲黃正黃正白
鑲白四旗營房相近應造學舍一所設教習二名
正紅鑲紅二旗營房相近應造學舍一所設教習

一名正藍鑲藍二旗營房相隔甚遠不便設立一
學每旗各應造學舍一所各設教習一名其內府
三旗既同一營房應造學舍一所設教習一名共
造學舍五所挑取教習六名其教習於八旗及內
府生員內擇其能訓誨者為之四年一換每月給
錢糧二兩每年三季共給米二十一斛二斗如有
善於教訓誠屬優等者咨行吏部以筆帖式補用
其平常者駁回該旗其教誨甚劣者將生員革退

其缺另行挑取奉

旨依議

以上教場官學

蒙古語學

雍正元年十一月副都統奇爾薩奏請八旗蒙古
佐領下各建立官學教習蒙古書話尋八旗都統
等議奏每旗設立一學揀選能蒙古書話者為助
教教習子弟於每佐領下擇可學者一人令其肄

業其助教員缺交吏部會同理藩院考取引

見補授再於八旗前鋒護軍領催馬甲內擇其能蒙古書

話者令協同助教教習其如何錄用之處應交部

另議具奏尋吏部議得助教八人外其協同教習

之人遇助教缺出由理藩院考選擬定正陪咨送

吏部引

見補授其肄業人等准其考試以蒙古筆帖式補用並奉

旨依議

以上蒙古語學

算學

康熙九年九月

諭禮部天文關係重大必選擇得人令其專心習學方能
通曉精微可選取官學生與漢天文生一同習學有精
通者俟欽天監員缺考試補用

尋禮部議於官學生內每旗選取十名交欽天監
分科學習有精通者俟滿漢博士缺出補用

詔從所議

雍正十二年奏准康熙五十二年設算學於

暢春園之蒙養齋簡大臣官員精於數學者司其事
特命皇子親王董之選八旗世家子弟學習算法又簡滿
漢大臣翰林官纂修數理精蘊及律呂諸書至雍
正元年告成

御製序文鐫版頒行自明季司天失職過差罕稽至此而
推步測驗固不協應際此理數大備之時正當淵

源傳授垂諸億萬斯年應於八旗官學增設算學
教習十有六人教授官學生算法每旗官學擇資
質明敏者三十餘人定以未時起申時止學習算
法

乾隆三年奏准設立官學教養八旗子弟專以讀
書繙譯為業以備將來錄用至算法一藝理數精
微非童稚所能驟通況以一時之暫教授三十餘
人勢難遍及又按算法乃欽天監專司其如何教

習錄取之處應令酌量辦理其官學生習算法概

行停止

案停止算學係由
尚書孫嘉淦奏准

又奏准算學設漢教習二人即於奏停八旗官學
內教習算學之人充補月廩等項照八旗官學漢
教習例五年期滿果能盡心訓課著有成效者該
管大員奏交吏部議叙舉人筆帖式充補者交與
欽天監以靈臺郎補用貢監生員充補者以挈壺
正補用官學生算學生充補者以博士補用將來

教習員關於奏停教習拔補完日令該管大員會同欽天監於學內教習有成之人考選充補

又奏准就欽天監附近專立算學一所額設滿洲漢人各十有二人蒙古漢軍各六人滿洲蒙古漢軍即於八旗官學內擇其從前曾學算法資性相近願學者不拘旗分選取漢人無論舉貢生童或世業子弟取同鄉京官印結具呈國子監會同管理算學大臣考試秉公錄取

案復設算學於欽天監附近之地係由大

學士郭爾

奏議准

又奏准算法中線面體三部各限一年通曉七政
共限二年每季小試歲終大試由算學會同欽天
監考試勤敏者獎勵怠惰者黜退別補

又奏准算學生每月膏火照官學生例在本旗咨
領

又議准欽天監天文生向於本旗考取生監補用
今應將五年期滿算學生學有成效者由該管大

員會同欽天監秉公考取擬定名次咨吏部注冊
俟各本旗天文生缺揆補至考取生監停其補用
再天文生每旗滿洲二人漢軍一人並無蒙古今
算學生既有蒙古六人為數無多應與滿洲算學
生一同考送吏部按定名次歸各該旗補用漢算
學生五年期滿一同考取舉人引
見以博士用貢監生童以天文生補用

四年奏准算學隸國子監管轄應稱國子監算學

所有考校一應文移案卷即用監印鈐蓋

又秦准算學教習之飯食衣服由監行文支給

十年秦准欽天監肄業生二十四人撥歸算學肄業毋庸別給膏火倘教習不敷即選學業有成之算學生協同分教已補者即食本俸未補者仍領學生膏火一應教習應試考取天文生均照算學生例

十二年秦准算學額設教習二人協同分教三人

嗣後教習未滿五年分教未經實授遇有陞任如實心訓課勤慎稱職之人均仍留教習令滿五年奏明交部議叙

二十五年國子監將滿洲算學生咨送吏部考試庫使部咨算學係題明專用天文生之人不應選用別項不便准考隨經算學咨稱查乾隆四年五月內議准算學事宜欵內有八旗算學生應試照官學生例辦理之語既有應試二字則凡官學生

應試之處自應遵照原議送考尋部復咨云既有
八旗算學生應試照官學例辦理之條自應准其
與考但查原題內稱算學生學有成效不應選用
別項今送考庫使之算學生仍咨算學查明如係
尚未成效之人既咨送國子監造冊送部以便一
體考試

附國子監所載則例

一八旗算學生告假告病由算學咨明國子監轉

咨該旗暫停膏火其銷假病愈者由算學將到學
日期咨明仍給膏火

一八旗算學生開缺另補由算學辦理咨明國子
監轉咨該旗將開缺之算學生膏火停止其頂補
之官學生將錢糧裁除外即支給算學生膏火
一八旗算學生取中天文生由算學移知國子監
轉咨該旗將膏火停止

一八旗算學生告回本學由算學咨明國子監仍

令在官學讀書

一八旗候補之算學生情願隨學肄業由算學咨

明國子監轉飭該生隨學肄業如有已經本監咨

退之處亦聲覆查照

隨學肄業各生仍食官學生錢糧乾隆十一年國子監因

隨學人數過多知照算學酌定以十二人為準

一算學教習衣服靴帽由算學移付國子監之繩

愆廳與八旗漢教習一體辦理

以上算學

附八旗義學

謹案八旗義學已于乾隆二十三年裁汰今附志其源委於此以備稽考

康熙三十年禮科給事中博爾濟疏請立

盛京兩翼官學得

旨京師八旗各佐領下幼童由各佐領內擇其優長之人
令其教習讀書及馬步箭著九卿一并議奏九卿等議
覆京師八旗子弟讀漢書者考取生員舉人進士
時仍令射馬步箭能者方准作文考試其餘幼童
十歲以上者本佐領各選一人教習滿洲旗分教

滿書滿語蒙古旗分教滿洲蒙古書語漢軍旗分
教滿書滿語並教馬步箭仍令各佐領驍騎校稽
查將此學名為義學

詔從所議

雍正元年十二月奉

恩詔養育人材首以學校為要宗室內有俊秀情願讀書
及八旗秀才童生內有家貧不能延師者宜各設立學
堂一概教育

四年四月禮部議八旗設立學堂分左右翼每翼各於公所設立學堂二所各設漢書教習二員滿漢書教習二員旗人內有家貧不能延師之秀才童生情願讀漢書者令入漢學堂教習情願讀滿漢書者令入滿漢書學堂學習其漢書教習於吏部咨取守部舉人於國子監咨取恩拔歲副貢生其滿漢書教習於八旗咨取舉人恩拔歲副貢生

臣部奏請

簡命大臣考選才學優長清漢精通者充職三年期滿咨
送吏部舉人照留京進士教習之例以應補之缺
即用貢生照國子監教習之例以應補之缺補用
其學堂於兩翼現有官房奏撥四所由工部修理
書桌椅檯等項亦由工部置辦臣部派司官二員
專管臣等亦不時稽查其學習生童有不肯專心
誦讀不聽教誨者即行懲責不許復入學堂教習
內有不肯盡心教導或行止不端者指名叅革其

教習照內教習之例每月給錢糧二兩每年給米二十四斛看守學堂房屋及傳事人於禮部所有八旗傳事披甲內每旗派撥一名奉

旨依議其稽查與翰林院衙門會同嚴查不可推諉

六年十一月副都統韓光基奏言兩旗共立一學八旗入學讀書之子弟每旗不過數人且有竟無一人者蓋因兩旗之人各自散處其遠者或值天寒或值雨水難行不能就學所以至於乏人請於

八旗官房內量其足用揀擇四所共為八所每旗各立一學增添教習四員共為八員每學一員其入學讀書之人不必限定額數年二十以下十歲以上情願讀書者俱令入學如有讀書不能成就者仍照常挑取兵丁或所居與別旗學舍相近情願就近讀書者聽其自便將此交禮部與八旗同行管轄其教習三年考滿及一應需用等項俱交禮部承管至揀選讀書子弟督查怠玩等事每旗

派叅領一員輪流承管如禮部承管事件或致廢弛及教習等訓誨不勤有悞子弟令該旗大臣查叅如本旗承管事件或致廢弛亦令禮部查叅管理旗務王大臣議如所請奉

旨依議

乾隆八年三月禮部奏從前考取八旗義學教習人員業經充補正擬照例奏請考試據滿洲文進士德音繡譯進士雙圖等具呈情願一體考試查

文進士繙譯進士向無考試八旗教習之例可否
准其考試恭候

欽定奉

旨准其考試

十五年奉

諭旨嗣後各旗義學教習所教學生內考中一二名者
仍留學三年考中三名者交部議叙

二十三年二月奉

上諭國家設立官學原欲成就人才而近來八旗義學徒有虛名而無實益況已有咸安宮國子監官學又兩翼新設幼官學此等學內八旗士子盡可肄業又何必留此無用官學反至於旗人有悞著將義學裁去所有咸安宮等處官學交該管大臣必以成人成才實效為急務將武藝騎射清語留心教誨即如讀漢書者亦必使之崇尚實學盡除虛浮惡習斷不可有虛名而無實益前經降旨交部臣明白回奏該部

將伊等平素懈弛之處飾辭具奏甚屬不曉事體除
歸宣光在部未久免其交部外其餘大臣俱著交部
察議

以上八旗義學

盛京八旗官學

康熙三十年禮科給事中博爾濟疏言

盛京府州縣俱設立學校考取士子

盛京左右兩翼亦應各設官學酌選俊秀幼童設立

滿漢官教習滿漢書馬步箭即於

盛京各部衙門筆帖式烏林人缺出補用得

旨著九卿議奏九卿等議覆

盛京係發祥重地教育人材宜與京師一體應如博

爾濟所請

盛京左右兩翼各設官學二處將彼處俊秀幼童各
旗選取十名每翼四十名滿學各二十名教讀滿
書習馬步箭漢學各二十名教讀滿漢書習馬步

箭交與

盛京禮部堂官不時稽查操演如

盛京有各部衙門筆帖式烏林人缺出照例補用滿
學設滿文助教各一員漢學設通滿漢文助教各一
員俱由吏部考授其漢學令奉天府尹於

盛京生員內擇其才學優長者各二名令其教讀學
舍由

盛京工部撥給

詔從所議

是年覆准

盛京左右兩翼設立滿漢官學其漢學行文府尹於
盛京生員中各取教習二名所取係廩生既充教習
廩糧停其支給應照京城八旗教習之例給倉米
十二石由

盛京戶部支給其廩缺另行拔補鄉試之年仍照例
准其鄉試

雍正二年覆准

盛京八旗教習舊例於奉錦二府屬生員內考取今
各學生員就考者少著將奉錦二府屬恩拔歲副
各貢生并生員一體與考秉公遴選學優者充職
三年期滿咨送吏部仍照舊叙用

十年

盛京八旗設義學四處選取漢軍俊秀子弟每旗各
十五名每學各三十名選學官教習滿漢書及馬

步箭奉天將軍司其事

乾隆二年定

盛京照京師例宗室覺羅共設立一學內設繙譯教習四人騎射教習四人漢書教習四人其漢書教習於奉天府舉人貢生內由府尹考取

盛京禮部序補三年期滿府尹等出具考語咨送宗人府與京師覺羅教習一體帶領引

見以知縣教職分別補用

二十八年議准

盛京左右兩翼官學左翼四旗內滿洲官學生三十
六名漢軍官學生四名包衣官學生三十名右翼
四旗內滿洲官學生三十四名蒙古官學生二名
漢軍官學生四名包衣官學生三十名左翼內並
無蒙古之缺應將左翼滿洲官學生定為三十四
名所裁二缺改為蒙古以昭畫一

四十三年五月禮部奏言據宗人府稱

盛京宗學覺羅學漢教習向來額設三人奉天府尹於所屬舉人貢生內考取由

盛京禮部序補教習漢書三年期滿府尹等出具考語咨送宗人府與京師覺羅學漢教習一體帶領引

見以知縣教職分別補用臣等伏思

盛京宗室覺羅向來立有官學專為通曉漢文而設但宗室覺羅子弟自當熟嫻弓馬及學習繙譯為

先務至欲兼習漢文則該處之舉貢生員等自為
師承留心講貫即無難於通曉若必官為設學而
考充教習者仍即係本地之人徒為該教習等進
身之捷徑其於官學諸生並不能有所裨益請將
盛京額設宗學覺羅學漢教習之例停止其現在已
補教習及先經考取未補者均毋庸復令充補以
黜虛名而崇實政奉

旨知道了

四十九年八月奉

上諭據穆精阿等奏閱盛京禮部考試助教繙譯卷七
本求取通篇穩順者殊不可得僅擇其文理稍順疵
謬尚少之卷擬取二本助教有教學之責自應選擇
嫻習繙譯者送考以便拔補何至咨到七卷內竟無
通篇穩妥之卷此項試卷向例係將軍會同禮部兵
部考試自不應漫無去取濫行咨送且此等應試之
人平日豈竟無所講習遽應考試耶著傳諭永瑋等

即將此次試卷因何平常之處據實覆奏

以上 盛京八旗官學

黑龍江官學

康熙三十四年題准黑龍江將軍所轄官兵內有
新滿洲席北索倫達呼里等應於默爾根地方兩
翼各設學一處每翼設教官一員將新滿洲席北
索倫達呼里及上納貂皮達呼里等每佐領選取
俊秀幼童各一名教習書義應補教官之人該將

軍選擇優長者將姓名咨送吏部其教官照京師

例稱為助教學舍該將軍撥給

按默爾根助教由黑龍江將軍揀選

補充

以上黑龍江官學

欽定八旗通志卷九十八